



Matadalan ba aplikante ba Pacific Engagement Visa (PEV):

Oinsá atu verifika ita-nia empregadór no oferta ba empregu

? Saida mak oferta ba empregu?

Oferta ba empregu mak rekeztu obrigatóriu ida ba aplikasaun ba PEV. Bainhira ita iha ona oferta ba empregu ida, ita tenke upload (hatama) oferta ne'e iha ita-nia ImmiAccount (konta Imigrasaun nian). Se seidak iha oferta ba empregu, ita-nia programa PEV nia vistu (visa) la bele hetan aprovasaun.

Oferta ba empregu mós hanaran kontratu serbisu nian.

Só ema ida de'it iha ita-nia aplikasaun presiza hetan oferta ba empregu ida. Ida-ne'e dehan katak aplikante prinsipál ka ninia kaben ka pár bele mós upload oferta empregu ida.

Aplikante prinsipál no mós ninia kaben bele asesu PEV nia Servisus Apoiu ba Empregu.

✓ Apoiu atu verifika ita-nia empregadór no oferta ba empregu

PEV nia Servisus Apoiu ba Empregu bele ajuda ita konfirma katak ita-nia empregadór no oferta ba empregu kumpre PEV nia rekerimentu sira.

PEV nia Servisus Apoiu ba Empregu sei serbisu hamutuk ho empregadór, só empregadór ne'e halo tuir Department of Foreign Affairs and Trade's (DFAT) nia politika no prinsipiu sira kona-ba prevensaun ba esplorasau seksual, abuzu no asédiu, katak Modern Slavery and PSEAH (Prevention of Sexual Exploitation, Abuse and Harassment).

Ita bele haruka ita-nia oferta empregu ba PEV nia Servisus Apoiu ba Empregu. Ami sei verifika katak empregadór no oferta ne'e kumpre kritéria sira hotu.

Depois verifikasaun ne'e, PEV nia Servisus Apoiu ba Empregu sei haruka ba ita karta ne'ebé konfirma

katak ita iha kontratu serbisu nian – karta ne'e hanaran Employment Contract Cover Letter. Bainhira ita upload ita-nia aplikasaun ba vistu, ita mós tenke upload karta ida-ne'e hamutuk ho ita-nia oferta ba empregu iha ita-nia ImmiAccount.

☑ Ita-nia oferta ba empregu tenke inklui informasaun saida de'it?

Favór ida, lee ita-nia oferta ba empregu atu verifika katak dokumentu ne'e kumpre PEV nia rekerimentu sira hotu. Hodi kumpre PEV nia rekerimentu sira, ita-nia empregadór tenke inklui informasaun tuirmai:

- **Tipu empregu:** Oferta ne'e tenkesér ba serbisu permanente, ka kontratu ba serbisu tempu-tomak ka tempu-parsiál ba prazu-fixu (porezemplu, kontratu ba fulan hamutuk 12 ka liu)
 - Oferta ba empregu kazuál (porezemplu, empregadór oferese serbisu só sira iha presiza ruma de'it) la kumpre rekeztu sira.
- **Indústria nia akordu ka akordu seluk** Ita-nia oferta ba empregu tenke inklui indústria nia akordu (award) ka akordu seluk (enterprise agreement) ida-ne'ebé aplika ba ita-nia serbisu. Akordu sira-ne'e mak dokumentu legál ne'ebé estabelese kondisaun mínimu sira ba empregu, hanesan taxa saláriu mínimu nian.
 - Ita bele lee indústria nia akordu sira iha Fair Work Ombudsman (FWO) nia sítiu internét: fairwork.gov.au/employment-conditions/awards/list-of-awards

- Se oferta ne'e inklui akordu seluk, ita bele buka-hetan akordu ne'e iha Fair Work Commission nia sítiu internét: fwc.gov.au/work-conditions/enterprise-agreements/find-enterprise-agreement
- **Detalle sira ba pozisaun:** Oferta tenke inklui ita-nia título empregu nian, knaar sira, fatin serbisu nian, no oras serbisu nian
- **Saláriu no kondisaun sira:** Oferta tenke inklui informasaun kona-ba osan hira maka ita sei manán, no naran husi indústriá nia akordu ka akordu seluk ne'ebé aplika ba ita-nia kontratu. Ita-nia empregadór mós tenke fó ita kópia ida husi deklarasaun hanaran Fair Work Information Statement (**FWIS**). Se oferta ba emprega mak ba serbisu ho prazu-fixu, empregadór tenke fó ita kópia ida husi deklarasaun hanaran Fixed Term Contract Information Statement (**FTCIS**)
- **Empregadór nia informasaun:** Oferta ba empregu tenke inklui empregadór nia Australian Business Number (ABN), kompañia nia enderesu negósio nian, no naran no informasaun kontaktu nian ba ema ne'ebé jere knaar hatama ema ba serbisu.

Atu hetan informasaun seluk tan kona-ba oferta ba empregu, loke FWO nia sítiu internét iha: fairwork.gov.au/employment-conditions/employment-contracts

Lia-bosok kona-ba empregu

Bainhira buka serbisu, ita tenke kuida ba lia-bosok sira (scams) kona-ba empregu ka serbisu. Lohidór sira finje katak sira hanesan empregadór ka rekrutadór loos hodibele na'ok ita-nia osan ka informasaun pesoál. Nune'e, importante tebes atu hanoin-hetan katak iha Austrália ita la presiza selu osan ba prosesu rekrutamentu nian. Ita nunka presiza selu osan hodibele hetan serbisu.

Kuidadu tebes se enfrenta sinál avizu tuirmai:

.....

Ema husu ita atu selu kedas osan ruma

.....

Ema husu kedas ita-nia informasaun pesoál sira

.....

Ita simu oferta ba empregu, maski ita la aplika ba serbisu ne'e

.....

Ita simu oferta ba empregu sira ho saláriu aas, maski ita ladún iha esperiénsia ba tipu serbisu ne'e ka prosesu atubele hetan serbisu ne'e mak simples tebes

.....

.....

Ita simu email sira husi konta pesoál (hanesan gmail ka hotmail) duké husi kompañia nia enderesu email nian. Mensajen ho sala gramátika ka soletra nian mós hanesan sinál avizu ida

.....

Ema haka'as ka obriga ita atu halo kedas buat ruma

.....

Dala ruma lohidór iha Austrália tenta atu kontakta ita liuhusi Mídia Sosiál (Facebook ka WhatsApp).

.....

Sempre haree fali empregadór nia sítiu internét ofisiál atubele konfirma katak serbisu ka empregu ruma mak réal ka loos. PEV nia Servisu Apoiu ba Empregu bele ajuda ita se ita iha preokupasaun ruma kona-ba oferta ba empregu ida.

Saláriu mínimu iha Austrália

Empregadu sira hotu iha Austrália iha direitu atu simu saláriu mínimu. Saláriu mínimu mak montante osan ne'ebé empregadu bele manán ba serbisu ne'ebé sira halo.

Saláriu mínimu mak montante osan antes ita selu impostu, ne'ebé bolu hanesan saláriu bruto (gross pay). Empregadu oioin sei manán saláriu mínimu oioin, depende ba tipu serbisu, sira-nia idade ka kapasidade atu serbisu (porezemplu, empregadu júnior, no serbisu ho orientasaun (apprentices no trainees)).

Ba empregadu barak liu, montante saláriu mínimu sei tuir de'it akordu ba sira-nia indústriá ka tipu serbisu. Iha akordu oioin ba indústriá no tipu serbisu oioin, entaun importante atu identifika akordu ida-ne'ebé loos ba ita-nia empregu.

Saláriu mínimu nasional (National Minimum Wage) aplika ba empregadu sira-ne'ebé la kobre husi akordu rejistadu ida. Ida-ne'e mak taxa saláriu mínimu ne'ebé tuir lei hanaran Fair Work Act 2009, no governu halo revizaun ba taxa saláriu ne'e kada tinan.

Empregadu sira-ne'ebé tuir indústriá nia akordu ida ka akordu rejistadu ida seluk iha direitu atu simu taxa saláriu mínimu balu, inklui taxa penalidade no subsídiu sira (penalty rates no allowances). Baibain, taxa saláriu sira-ne'e aas liu saláriu mínimu nasional.



Ita bele aprende liután kona-ba direitu mínimu sira iha serbisu-fatin, inklui saláriu no asuntu empregu seluk iha Fair Work Ombudsman nia sítiu internét: fairwork.gov.au ka hodi tuir ami-nia sesaun informasaun empregu sira.

PEV nia Servisus Apoiu ba Empregu hato'o beibeik webinar sira-ne'ebé fornese informasaun liután kona-ba konfirma ita-nia oferta ba empregu. Ita bele hetan informasaun liután kona-ba PEV nia Servisus Apoiu ba Empregu iha pev.gov.au

Iha ami-nia sítiu internét ita bele buka-hetan rekursu seluk tan, inklui follu faktu sira no modelu dokumentu atu kria resume sira.